

## REGIONAL NEWS

HEADLINES:-

1. Vawk pulhri African Swine Fever (ASF) avangin kumin hian Mizoram chhungah vawk 961 an thi tawh a, vawk 1,315 suat a ni tawh bawk.
2. Chin state hmar lama Myanmar sipai hmunpuite Chin mipui sipai pawl hrang hrangin an lak hnu-a indona kal zelah Mizoramah raltlan an la pun belh zel.
3. Mizoram Police silai keng 1,047 awmna company 15, state pawna inthlan venhimna hna thawka kalte chuan vote an thlak ve thei dawn lo tih a chiang tawh.
4. Lok Sabha inthlanpui thawh 6-na atana campaign theih hun, vawiin tlai khan a tawp.

&lt;&gt;&lt;&gt;&lt;&gt;

ASF RESURGENCE

Vawk pulhri African Swine Fever (ASF) avangin kumin hian Mizoram chhungah vawk 961 an thi tawh ni a report a ni a, ASF vanga vawk suat zat chu 1,315 a tling tawh bawk.

Animal Husbandry & Veterinary Dept in a chhinchhiah danin vawiin khan ASF vangin vawk 45 a thih belh leh a, vawiin vek hian vawk 11 suat a ni. Vawiin hian Tuirial khua-ah vawk 30 a thi a, Thingsulthiah khua-ah 6 thi-in Khawzawl district-a Dulte khua leh Thingsul Tlangnuam-ah 3 ve ve a thi a. Zemabawk-ah 2 leh Ramhlun Sports Complex-ah 1 a thi bawk a ni. Vawiin vek hian Khumtung-ah vawk 9 suat a ni a, Chhingchhip-ah pahnih tihlum a ni bawk. Kuminah hian district 6-ah ASF vawk pulhri hi a leng mek a. ASF hri lenna ni a AH and Vety department-in an puante chu Aizawl, Champhai, Lunglei, Saitual, Khawzawl leh Serchhip district te a ni a. District dang zawng - Siaha, Lawngtlai, Kolasib, Mamit leh Hnahthial te chu vawk pulhri lakah hian an la him rih ni a ngaih a ni.

Aizawl khawpui a veng thenkhat, ASF lenna a puante chu hlih a ni leh tawh chungin veng hrang hrang chu hri lenna hmuna puan belh a ni a. Chutiang bawkin Aizawl district leh district danga khaw engemaw zat chu vawk pulhri lenna khua-a puan belh mek a ni.

&lt;&gt;&lt;&gt;&lt;&gt;

SOLID WASTE MANAGEMENT

Kolasib khawpui bawlhhlawh lak khawm sawngbawlina Solid Waste Management Centre, Dihmuntlang, Bairabi road chuan ngaihsak a hlawh tawk lova, enkawl dan a fel tawk loh avangin dumping ground leh a chhehvelah bawlhhlawh chhun khawm a tam hle.

Vawiin khan Kolasib District MJA member-te'n he hmun hi an tlawh a. An tlawh lai hian bawlhhlawh hi bawhlawh paihna hmun a khah deuh vek bakah, bawlhhlawh thliarhranna tur - Waste Resource Centre a bawlhhlawh an thliar hranna pawh in duhthu a sam lovin, Waste Resource Centre chheh velah pawh hian bawlhhlawh paih a tam hle bawk niin an sawi. He Solid Waste Management Centre hi enchhinna atana hman a ni a, Aizawl khawpui bak District hmunpui a awm chhun a ni a. He Centre ah hian thawktute chenna in leh building dang changtlung tak tak awm mahse, heng insakte hi vawiin

thlengin luahtu awm mumal lovin a tawngtawl mek a ni an ti bawk a, Waste Resource Centre ah hian bailing machine pakhat leh bawlhhlawh nawr na tur thela awmin, bawlhhlawh thliarhranna khawl Belt Conveyor machine a awm lo bawk.

Heng bawlhhlawh dah khawmte sawngbawl hna hi mimal pahnih kutah dah niin, anni hian hlawhfa ruaiin bawlhhlawh thliar hran hna an thawk a, Team khat hi tun thla tir atanga thawk tan chauh an ni a. Ni khata bawlhhlawh lirthei trip hnih chhunkhawmna Solid Waste Management Centre ah hian thawktu awm reng chungin bawlhhlawh hi a khat deuh reng thin a, hei vang hian dumping ground chhehvelah chuan bawlhhlawh a khat vek thin a, a zualpui erawh tunhnaiah JCB hmanga thenfai a ni.

Kolasib District Urban Development Officer sawi danin bawlhhlawh tawih thei lote hi a hralh theih tur chi leh a paihna hmuna paih tur chi te an thliar hnuah a hralh theih tur hi bundle a siam a hralh tur a ni a, a leitu tur sorkarin a thlan No Waste Pvt Ltd te chuan bawlhhlawh thliar hran a that tawk loh avangin a hralhna lamah harsatna an tawk niin an sawi a, hetih rual hian sorkar nena MOU an ziah pawh a tawp rih tih sawiin, buaipui zui an tum tawh lo tih an sawi a, hei vang hian vawiin thlengin heng bawlhhlawh bundle te hi mumal taka hralhchhuah a la awm lo a ni.

<><><>

#### REFUGEES

Chin state hmar lam Tonzang leh Cikha khua a Myanmar sipai Hmunpuite Chin National Army (CNA) leh an thawhpui PDF pawl hrang hrangin an lak hnu-a indona kal zelah Mizoramah raltlan an la pun belh zel.

Nimin khan Myanmar raltlan 3 chu Zokhawtharah an rawn luh belh a, tukinah mi 12 chu Saitual district-ah an rawn luh belh leh bawk. Nimin piah (Thawhlejni) atanga tukin thleng khan raltlan hi 70 an lo lut a, an zinga 61 hi Myanmar atanga lo lut an ni a. Thawhlejni a lo lut thar mi 44 te hi Hakha, Khawmawi, Falam, Tedim, Tahan , Tuingo leh Khampat atanga lo lut an ni hlawm a Champhai district a Zokhawthar-ah an la khawsa rih a. Midang 14 lo lutte chu Saitual district-ah an awm mek thung. 'Mipui tangrual sipai' an tih maite'n Chin state hmar lam khaw engemawzata Myanmar sipai camp an lak hnu hian Myanmar indo thlawhnate chuan helai bial vel hi a bomb zui zel a. Tonzang leh Cikha khua bakah Lungtak leh Phaitu-ah pawh bomb an thlak nasa hle a, bomb thlak avang hian biakin tiamin in 40 aia tlem lo a chhia ni a thudawn a ni a. Nizan dar 11 thleng khan silai ri a la reh lo niin an sawi bawk. Tonzan vela bomb thlak a nih avang hian Khawmawi leh Rikhawdar khawmite chu ralkhelin nimin chawhma khan Zokhawtharah mi tam tak an rawn tlan lut a. Chawhnu lamah erawh chuan an kir leh vek ni a thudawn a ni.

Hetihlai hian Thawhlejni chawhnu lam khan Bangladesh atangin Lawngtlai district a Hmawngbu khua-ah chung khat raltlan mi 3, an lo lut a. Nimin zing khawvar hma khan mi 6 dang an lo lut leh bawk a ni.

Chin state hmarlama inbeihna nasa tak avang hian May ni 16 atanga Thawhtanni thleng khan raltlan 938 chu Champhai district-a Vaikhawtlang, Khuangphah leh Hnahlan-ah te an lo lut a. Hemi rual hian mi 168 chu Saitual district a Teikhang, Kawlbem leh Mimbung khu-ah te an lut bawk a. Chin state chhim lam Vairum, Salachhuah, Laty, Bakla, Piedo, Bakalei leh Tisavai khua atangte in raltlan 198 zet Siaha district-ah lo lutin Laki, Lomasu leh Lopu khua-ah te an awm mek bawk.

Anni hi Maraland Defence Force (MDF) leh Chinland Defence Force (CDF-Mara) te inngirngona boruak a san tak avanga rawn tlanhchia ni a thudawn a ni. Chin state chhim lam tho Paletwa khua leh a chhehvel atangin Khumi hnam mi 22-te chu Lunglei district-a Khawmawi khua-ah an rawn ral tlan bawk a. Anni hi Arakan Army hel pawlin an tihbuai thin vanga rawn tlanhchia ni a hriat a ni. Heti hian Mizoramah Myanmar atanga rawn ral tlan hi tukin thleng khan mi 35,500 an tling tawh ni a chhut a ni.

<><><>

#### MZP

Vawiin khan Mizo Zirlai Pawl (MZP) General Headquarters, Aizawl in High School Leaving Certificate (HSLC) Examination Top 10-a Mizo tlingte chawimawina hun Aizawl Vanapa Hall-ah an buatsaih.

He hunah hian PHE Minister Prof. Lalnilawma chuan HSLC Top-10 a tling Mizo zirlaite chu lawmpuina leh duhsakna a hlan a. Chutih rualin an bul tanna a nih avangin, an hmabak a la tam a. Hlawhtling zel turin theihtawp chhuah turin zirlaite chu a fuih a ni. HSLC 2024 a Mizo Zirlai titha chawimawina hunah hian MZP President Pu H. Lalthianghlina chuan thusawina hun a hmang bawk a ni.

Vawiina HSLC 2024 Top 10-a Mizo tling chawimawina hunah hian mipa 5 leh Hmeichhia 8 te hnenah chawimawina thuziak, tangkafai cheng sang nga (5,000), Lalhmachhuana Zofa lehkhabu ziah 'Mizo Lui Hmingthangte', tih leh Mizoram General Knowledge English Edition bakah Lalhruaitluanga ziah Zirna Lamtluang Lehkhabute hlan an ni.

<><><>

#### POLICE FRANCHISE

Mizoram Police silai keng 1,047 awmna company 15, state pawna inthlan venhimna hna thawka kalte chuan vote an thlak ve thei dawn lo tih a chiang tawh.

Chief Electoral Officer (CEO) pisa chuan hemi chungchangah hian Election Commission of India lamin Bihar, Uttar Pradesh leh Madhya Pradesh a inthlanna a duty Mizoram Police-te chuan vote an thlak a remtih loh thu a tichiang tawh niin an sawi a. Ministry of Home Affairs-in ruahmanna a siam angin Bihar leh UP a duty turte hi March ni 28 leh 29 khan an duty-na lam pan turin rel hmangin an chhuak tawh a. March ni 30 tlai lamah chauh Mizoram Lok Sabha biala ding tur tihchian a nih avangin postal ballot hmanga vote an thlak theihna tura an puala Facilitation Centre siam hman a ni lova. An duty-na tur hmun pana April ni 3-a rel hmanga chhuak MP a duty turte tana Facilitation Centre siam phalna ECI-a CEO pisa-in a zu dilna pawh April ni 8-ah chauh chhanna hmuh a nih avangin vote thlak lovin an kal ta a ni.

CEO pisa atanga thudawn danin hemi hnu hian Mizoram Police mi 1,047-te'n an duty-na hmun theuh atang tal a postal ballot hmanga vote an thlak phalna an zu dil pawh Mizoramah April ni 19-a vote thlak a nih tawh avangin Election Commission chuan a rawn hnawl a. Hemi avang hian Mizoram pawna inthlan duty-a kal State Armed Police Force (SAPF)-te chuan Mizoram Lok Sabha inthlanna-ah vote an thlak ve thei dawn ta lo a ni. Political party thenkhat chuan hei hi pawl an tih thu sawiin Mizoram ang vote nei nuai 8 chuang hret chauh awmna-ah chuan inthlan result tidanglam pha niin an ngai a. Chubakah vote tlak chhiat chhanah an puh bawk a. Kumina Mizoram Lok Sabha bial inthlanna-ah

khan vote za zela 56 pont 87 chauh a tla a, hei hi hun hma lam ngaihtuah chuan a tla chhe hle a ngaih a ni.

<><><>

#### TRAFFIC OFFENCES

Kumin chhungin Aizawl Traffic Police ten lirthei dan bawhchhiatnaa an man tam ber chu a dahna hmun ni lo a lirthei dahte an ni.

He thu vawiin Akashvani Aizawl-in a kawmnaah Traffic Sherista Pu Lalawmpuia chuan kumin January atanga April thlenga Danbawhchhia lirthei man zat chu lirthei sangthum za sawmruk pariat a ni, a ti a. Dan bawhchhiatna avanga pawisa chawi tling khawm chu cheng nuai sawmhnih pakhat singriat sangriat zali a ni a. Tun hnaiah lirthei a dahna lo a dahte an man hnem ber thu a sawi a.

Aizawl khawpui chhunga Traffic sign hrang hrang zingah Zebra crossing chu mipuiin an zawm that thu leh Traffic lights chu mipuia Inzirtirna tha zawk a awm rih loh avangin an la kalpui thei lo niin Pu Lalawmpuia chuan a sawi bawk a ni. Traffic Sign hrang hrang thawmthat ngaite pawh a hranpa a donation an nei loh avangin thawmthatna hna an kal chakpui theih loh thu a sawi a.

Chawlhni tinin hmun lun laiah Mobile Checking an kalpui thu leh a inkar thlakin Aizawl khawpui daifemah a bikin an dap thin thu a sawi a. Thla khatah vawi khat zan lama endik hna zan dar 10 atanga zing dar 3 an kalpui thin thu a sawi bawk. Pu Lalawmpuia chuan Aizawl Municipal Corporation (AMC) in demarketed parking area a siamah chauh lirthei din phal a nih thu leh chumi hmun lo a lirthei dahte chu man an nih thin thu a sawi bawk a ni.

<><><>

#### 6<sup>TH</sup> PHASE CAMPAIGNING ENDS

Lok Sabha inthlanpui thawh 6-na atana campaign theih hun, vawiin tlai khan a tawp a, state leh union territory 8 huamchhunga Lok Sabha bial 58 – Bihar-a seat 8, Haryana-a seat 10, Jammu & Kashmir-a seat 1, Jharkhand-a seat 4, Delhi-a seat awm zawng zawng 7, Odisha-a bial 6, Uttar Pradesh-a bial 14 leh West Bengal-a bial 8-ah te, naktip, Inrinni khian vote thlak a ni ang.

Heng bial 58-ah hian an vaiin candidate 889 an awm a, heng zingah hian Union Minister, Dharmendra Pradhan, BJP hruaitu Bhartruhari Mahtab, Aparajita Sarangi leh Sambit Patra-te, BJD Organising General Secy, Pranab Prakash Das-a te an tel a ni.

<><><>